

章氏遺書

第三三册

章氏遺書外編卷第十二

永清縣志七

義門列傳第七

志曰井田封建不可復矣律令懲匪僻而不可以責仁義則其勢也夫分形同氣憂樂惻切猶如一身不三數世而漸於行路豈細故哉而人每習而安之原其所以分合蓋起於財貨之可以私爾夫慷慨者好施而達觀者輕物當世蓋有之矣然卒不能推行家政以厚風俗則愚智不齊而主持乎門內者無其術也今使一父二子四孫八曾循至元孫百畝之產受者無什一矣強者可以倍蓰弱者至於不能自存而天地有數之生不能皆給宜其溫飽寡而無告者多矣程子曰人生天地間

如山之有禽獸草木未有禽獸草木日繁而山窮於不
給焉者然則生齒雖多誠合多人之智力而營之如一
身雖欲求困苦而無告者不可得矣井田之效人無甚
富亦無甚貧貧富不相耀而井廬友助之道存故易於
爲仁義使聚族之眾魯者操耕作而敏者業詩書强者
任勞力而弱者持謀計通功合事雖井田良法何以加
焉易曰渙者散也物不可以終渙故受之以節節之爲
義蓋取澤上有水君子以制數度議德行者也渙當受
之以萃不於萃而於節者明乎度數德行固所以聯羣
渙者也然則知萃處之利而不知操術以持乎恆久亦
不可以萃處矣余旣表永清士族推明支系聯屬之故

著之於篇若惠元莊劉氏五世同居大青垓龔氏燕氏
異姓同居俱事之尤卓異者采其始末撰爲義門列傳
爲當世風

惠元莊劉氏其先山東人前明中葉有劉奐者北遷永
清奐八世孫尙賢始居惠元莊生二子懋勸懋員懋勸
之後無所考懋員娶於孫有子二人長馨次彩自尙賢
至馨彩三世俱以淳謹愿樸見稱鄉黨馨卒無子彩生
二子印捷印璿印璿爲馨後馨旣卒彩命印璿奉馨婦
張別宅以居田業所出彩經營之贍張母子不爲經界
印璿卒遺子玫幼印捷迎張氏挈嫠婦孤孫始合居焉
時康熙三十一年壬申也印璿婦亦張氏繼室也印璿

之卒張年二十有九子玫生未匝月張勵志守節友于伯姒印捷凡四娶寶氏李氏俱早卒次孫氏生子鉉次張氏生子瑚瑚生三歲失母張撫如己子戊寅印捷卒鉉年二十有六瑚財八歲玫七歲耳鉉已能經紀家事張年未四十也主持門內閨範肅然鉉瑚終身呼張爲母至其家者亦不辨三子爲從祖兄弟云自鉉治家政內稟命於季母外率瑚玫講明孝友嫻睦兄弟以次授室三十年閒生齒漸繁而家庭於是稱小康焉雍正四年丙午鉉卒瑚年已壯繼受家政明年會永定河決惠元莊適當其衝田場廬舍一時淪爲鉅浸而家事遂中落矣惠元莊者自乾隆五年庚申得名初名火燒營康

熙戊寅河流改移火燒營在河隄東雍正丁未河益東徙火燒營盡爲河流居民遷聚新河之東名賀堯營乾隆庚申官修草壩障河南流賀堯營當厭土處於是渡河西遷還火燒營舊基甲戌 天子巡狩畿內臨視其地以居民逼近洪流命益西徙則康熙戊寅以前經流故道今爲高阜者也前後三十年河流屢改居民遷徙不遑或亡或散未有恆理而劉氏生聚百年支屬日廣乃從崎嶇艱危之中保護維持用能履困而亨蔚爲舊族鄉黨以是推其家風初瑚甫受事卽遭河患當水大至聲如殷雷浸沒戶牖家人急不得出鑿壁旁通升屋呼救鄉人結筏拯之始得登陸迴顧所居欹側中流身

命以外粒米寸絲不復有故物矣瑚則結蘆爲舍偕老
幼婦孺聚屯沙洲從人乞貸權子母錢偕子弟力作生
計支吾日月至使幼童穉子撝取稗子草實供朝夕炊
早作晏息撙節儲蓄未及十年而家業稍稍起矣瑚凡
三娶生子甘棠甘醴甘霖兄鉉四娶生子民悅本涵本
清弟玫娶聶氏生子本淑本淵當鉉卒時其弟四繼室
留不詳其母族賢明善內治瑚竭勞於外留居中調劑之略
如其季母張焉瑚當河決之後復恢復舊家中閒以水道
妨墓遷葬三十餘棺婚嫁兄弟子女若子孫女幾無虛
歲又爲延師課迪子弟自甘棠爲縣學生後起者彬彬
多儒業矣而是時食指五六十人皆瑚竭蹶營之無有

廢事瑚晚歲得疾忽忽若不能言者醫者以謂勞心太過節勞庶幾可已瑚喟然曰昔兄鉉爲家督自行敦睦外置酒治具清談高宴日聞嘉賓良會而已然而三十年事無不治余小子猥承其後河決於東墓遷於西朝營隄北暮築河南挈挈無有寧歲智竭力耗然而三十年僅稱事治人生甘苦勞逸豈不以命乎哉豈不以命乎哉是時兄子與己子俱長大能事事矣嘗請代瑚勞役瑚固領之遇事輒又身勤不能自忍以是竟以積勞疾卒年六十餘是爲乾隆庚午云瑚旣卒民悅長家持大體本清璧畫經營稱任使焉而瑚繼室張猶佐伯姒留教率諸婦女閨門無有閒言未幾留亦卒張主內稱

方嚴於子女有過督責無稍恕者必至改過然後已然性慈惠子甘棠鄉里推爲善士嘗經紀留養局局事詳戶書及建置圖張屬其子善恤無告窮民每於歲首必親詣局中閱視老幼男婦自攜私財及餅餠之屬徧施給之歲以爲常今年八十餘矣猶精敏能持家計本清初攝家事劉氏食口益多親屬多言宜析爨者民悅聞之召諸昆從悉至中庭愀然告曰外人僉言析爨余甚懼焉意余德薄無以倡率諸弟守先人規矩鄉黨乃有閒言余得弗匪人耶諸昆從皆惶悚自責立若無所容身於是相與計議久遠以謂人眾非立法度家政不可齊遂度子弟才質堪治任者課以職業分條其事俾本

清糾正之而受成民悅以爲恆經每晨朝長幼集會庭
中以次白所治事咨詢可否出而行之嚮晦復集述前
所爲無有蔽匿非大故及遇疾病率行不廢民悅天性
和易子弟有不當理或從糾舉以聞民悅莞爾而笑無
所置可否其人自愧請悔過亟獎許之以是子弟爭勸
於善丁亥民悅卒本清亦老不治事甘醴踵起任之孝
友之風至今無改易焉民悅生一子坦本涵生子二培
壘本清生一子堪甘棠生二子墉增甘醴生一子垣甘
霖早卒無子以甘棠次子增爲之後本淑生一子均本
淵亦早卒無子本淵婦留氏不詳其母族當本淵卒時年二
十九貞節自矢民悅兄弟俱憐而敬之今生五十三

矣勵操如一日兄弟之子無可繼者故久未立嗣留曰
余依伯仲之間二十餘年不自知爲未亡人也坦娶張
氏民悅卒坦夫妻善事繼母安安有外女安愛之甚於
劉氏子女劉氏子弟無私蓄安固欲贍其女坦能曲意
將順傾其婦匱無稍吝惜卒能得安歡家人以是重之
民悅有女乾隆乙亥生二十二年歸魯村郭燕爲繼室
越二年燕卒無子永清風俗死無後者不得從葬先塋
而燕卒時支屬無當嗣人家人遂葬燕別隴劉痛於心
哭徹日夜不休淚盡血出目爲失明郭父感歎爲繼疏
屬子長庚劉撫字之俾從父家授讀以爲燕有後矣然
猶未得合祔舅疾旋卒劉復請於宗人宗人哀而許之

又以家貧不克襄事兄坦勉資給焉遂遷王姑君舅及燕與前室趙氏四棺附於王舅新阡蓋自丁丑以至甲午拮据經營凡十八年竟成其志孀居貧甚兄坦贍其母子及其君姑又爲遷居於沈家村便省視也長庚長習貿易今劉有子婦矣坦生子鳳鳴墉生子鶴鳴培生子玉鳴垣生子鑾鳴其餘有幼未娶者自懋員兄弟分支至鳳鳴兄弟已六世矣劉氏嘗遭水患譜牒散失不可考懋員不知爲何時人彩爲懋員次子印璿又爲彩之少子印璿繼室張氏生於康熙三年以理測之懋員當生明萬厯中同居至今凡百五十年

大青堡農民燕尙華娶於張氏生一子一女康熙初以

女歸霸州朱家營龔希賢尙華子進朝娶羅氏兩家俱
貧困又子立無兄弟行康熙三十七年庚午燕女卒遺
子尤鼎生始九歲次尤鼐生三歲耳希賢貧乏不能自
存而進朝方負販木繇逐什一利不足自給見姊卒二
甥失恃乃請於父母俾希賢挈二子依燕氏同居當是
時二世甥舅歡若父子兄弟進朝婦羅撫字孤甥亦不
殊毛裏焉希賢進朝負販於外而羅力支持於內尙華
夫婦雖老且貧然朝夕奉養無有閒缺尤鼎年十五能
貿易雞子佐父若舅所不給久之家中稍有蓄儲尤鼐
專雞子生業習久而精通其道初爲負擔市易漸用牽
車服賈康熙末年遂以居積雞子立鉅肆於京師京師

行市同業者多比廛以居惟貨雞子他人無爲之者故
尤鼎所獲獨得豐饒希賢進朝行買木縣利亦倍蓰遂
置田圃募傭耕作希賢尤鼎經紀於家尤鼎居京坐廛
肆進朝往返於道量時貴賤買遷有無家事於是始稱
盛焉進朝生二子萬倉萬箱進朝欲使世商賈業希賢
謂曰余甥舅四人其初朝暮不能自保同力一心經營
有年幸承天佑致此苟完業賈非得已也若子俱秀慧
又且無饑寒患曷使業儒與其役役逐市井游也苟謂
余子勤勞於外若子匡坐絃誦非心所安則余二人鏟
形迹同甘苦是何如者諸子宜不以是爲疆域也進朝
於是延師課其二子二子業儒有成相繼爲縣生員尤

鼎娶婦田尤鼎娶婦劉萬倉婦亦劉萬箱娶婦王中表
娣姒相得如女兄弟康熙丙戌尙華壽終希賢執子禮
服三年喪尤鼎尤鼎並爲義服期年辛卯希賢卒進朝
及其二子皆爲期服以報喪次哀戚弔者不辨爲二姓
人自進朝希賢同爨執兄弟誼其後生齒漸多家亦漸
裕乃推一人主持家政其餘以次授之職業子弟穎者
業儒强者服賈愿者力於農田婦子通力合作不蓄私
財如是七十餘年祖父以訖孫曾內外無閒鄉人爲之
語曰四世不分爾我一鄉莫辨親疏稱紀實云萬倉生
三子璞璟璋璞生三子宗渭宗海宗淳宗渭生子標璟
生子宗泗璋生子宗洛宗洛生子楷萬箱生二子瑒瑛

瑑生三子宗瀚宗淇宗沂宗瀚生子格宗淇生子卓瑛
生子宗浩標楷兄弟於進朝爲元孫於尙華爲六世孫
璞歲貢生瑋瑑瑛宗淳宗泗宗洛皆生員是爲燕氏五
世尤肅生二子碩彧碩膚尤肅生二子碩彥碩俊碩彧
生三子瓚琰琦碩膚生一子珩碩彥生一子瑤碩俊生
四子玥琳瑚璉瓚生三子自源自瀾自涵琰生三子自
潤自溥自澎琦生子自波玥生子自深琳生一子自闊
碩彧歲貢生琦生員自源兄弟於進朝爲元孫於尙華
爲六世外孫是爲龔氏五世中表兄弟行次相從不復
異長以是世其家云乾隆二十七年庚辰歲比不登二
姓親屬五十餘人傭力其家者亦且三十餘人爨火不

給乃取田宅財貨均分爲四萬倉萬箱尤肅尤肅四族之人各得其一而廬舍相望友助相接至今四族子弟交親猶手足也先世逸事與其行誼尤著聞者鄉人類能言之今撫其略著於篇進朝性仁厚愛施予見行乞者雖踵相接未嘗不應晚好浮屠家言終歲蔬食雍正三年乙巳年饑爲粥於路食餓者凡百千人知縣宋晶以尙義樂施題其門楔希賢長進朝二十年餘與進朝情性尤浹初習貿易爲利甚微顧不肯以一語欺人人亦無欺之者以是賈業日起好節儉嘗戒家中人毋暴天物見僕婢飲食遺蔬殘粒偶墮地下必掇食之其涓謹類如此尤肅天性伉爽居京師三十年創立行市與